

ԿԱՐՄԻՔ

Թ.00.01 «Փիլիսոփայություն» մասնագիտությամբ փիլիսոփայական գիտությունների դոկտորի գիտական աստիճան հայցող

Դավիթ Ռոմիկի Մոսինյանի՝

**«Պատմության փիլիսոփայական հայեցակետերի մեթոդաբանական վերլուծություն»
ատենախոսության վերաբերյալ**

Ատենախոսությունում քննարկվում են արդիի հայ պատմագիտության համար շատ կարևոր մեթոդաբանական նշանակություն ունեցող պատմության փիլիսոփայական հայեցակետերը: Ատենախոսն անդրադառնում է հիմնախնդրի ակունքներին, տեսամեթոդաբանական իմաստավորումներին, ցուցաբերում է հեղինակային մոտեցում հետազոտական նյութի քննարկման ժամանակ: Մեզանում պատմության փիլիսոփայական իմաստավորման փորձերի սակավությունը պայմանավորում է ատենախոսության թեմայի արդիականությունը:

Ատենախոսական աշխատանքը բաղկացած է ներածությունից, չորս գլուխներից, եզրակացությունից և օգտագործված գրականության ցանկից:

Աշխատանքի առաջին գլխում դիտարկվում է պատմության գոյաբանական հայեցակետը, ներկայացվում են պատմության ենթակայի ակտիվ և պասիվ հոլովույթները:

Երկրորդ գլուխը նվիրված է պատմության իմացաբանական հայեցակետի յուրահատկությունների վերլուծությանը: Ատենախոսը միանգամայն իրավացիորեն կասկածի տակ է դնում պատմության «օբյեկտիվ» ճանաչումը, հետազոտողների ուշադրությունը հրավիրում հասկացման մեթոդաբանական կարևորության վրա:

Երրորդ գլուխը հաջողված փորձ է պատմության տրամաբանական և բարոյագիտական հայեցակետերը համադրելու և դիտարկելու միասնության մեջ:

Նման համդրման մեթոդաբանական կիզակետը պատմության իմաստի գաղափարն է: Իմաստի միջոցով է հնարավոր դառնում պատմության ամբողջական պատկերի կառուցումը:

Չորրորդ գլխում դիտարկվում է պատմության քաղաքագիտական հայեցակերպի կենտրոնական թեմա ներկայացվող համաշխարհային պատմության հնարավորության հիմնահարցը: Արևմուտքի և Արևելքի պատմության միասնական դիտարկմամբ հնարավոր է կարևոր գործիքներ մշակել նաև Հայոց պատմության փիլիսոփայական իմաստավորումների համար:

Ատենախոսությունը կատարված է բարեխղճորեն և գրագետ, հատկապես արժեքավոր ենք համարում հեղինակի կողմից կիրառված մոտեցումները:

Ատենախոսության մեթոդաբանական առանձնահատկությունն այն է, որ ատենախոսը իրականացրել է համալիր փիլիսոփայական հետազոտություն: Քննադատական, պատմահամեմատական, հերմենևտիկական և ֆենոմենոլոգիական մեթոդների համալիր կիրառումը հնարավորություն է տալիս վերլուծել պատմության փիլիսոփայական հայեցակերպերը մեթոդաբանական բարեխճության և գիտական հիմնավորվածության պատշաճ մակարդակում:

Ուսումնասիրելով հարուստ տեսական նյութ՝ հեղինակը փաստարկում է, որ պատմագրությունը շարունակաբար աշխարհակարգի վերափոխումներից բխող նոր մոտեցումներ և մեթոդներ է պահանջում: Շատ արդիական է այդ միտքը հատկապես ՀՀ կրթության ոլորտում իրականացվող պետական քաղաքականության տեսամեթոդական հիմքերը վերանայելու անհրաժեշտության համատեքստում:

Ատենախոսության գիտական դրույթները և եզրահանգումները մեթոդապես հիմնավորված են և մանրակրկիտ ձևով հետևողականորեն փաստարկված:

Ատենախոսության գիտական արժեքը կարևորվում է ոչ միայն դուրս բերված եզրահանգումների հիմնավորվածության և հուսալիության տեսակետից, այլ նաև մեծածավալ նյութի մշակվածության առումով: Հեղինակն իրեն հասու լեզուներով

հրատարակված մեծածավալ գրականություն է ուսումնասիրել և ենթարկել վերլուծության: Ատենախոսի ստացած գիտական արդյունքների հիմնավորվածությունն ու հուսալիությունը հաստատում է տարաբնույթ գիտական աշխատությունների, հայտնի փիլիսոփաների մեթոդաբանական մոտեցումների օգտագործումը:

Ատենախոսը փաստարկում է այն տեսակետը, որ պատմագրության հնարավորության հարցին իբրև պատասխան ձևավորված բոլոր ուսմունքներն էլ մի կողմից հիմնավոր են, մյուս կողմից՝ խոցելի: Հատկապես խոցելի է մեկընդմիջ տրված «օբյեկտիվիստական» պատմագրությունը: Դրանով ատենախոսության հեղինակը մեթոդաբանական ուղեցույց է տալիս ժամանակակից հայ պատմագետներին: Պատմագրությունը շարունակաբար վերակառուցել է պետք:

Ատենախոսության գիտական նորույթը պայմանավորված է տեսական և կիրառական բնույթի հետևյալ արդյունքներով՝

Ատենախոսության մեջ համակողմանի ներկայացված են պատմության փիլիսոփայական հայեցակերպերի առանձնահատկությունները մեկ միասնական մեթոդաբանական հետազոտական տիրույթում: Դա մեթոդաբանական նոր հնարավորություն է ստեղծում հիմնախնդրի հետագա ուսումնասիրությունների համար:

Շատ արժեքավոր է հեղինակի կողմից կիրառված համակարգային մեթոդի միջոցով իրականացված պատմության փիլիսոփայական հայեցակերպերի տիպաբանումը՝ գոյաբանական, իմացաբանական, տրամաբանաբարոյագիտական, քաղաքագիտական հայեցակերպեր:

Հեղինակին հաջողվել է որպես ատենախոսական հետազոտությունից ածանցյալ հետևություն ցույց տալ, որ հայ պատմագրությունը ցայսօր մեծապես առաջնորդվում է պատմագրության խոցելի հարացույցի մեթոդաբանությամբ: Այդ հարացույցի

փոփոխությունը կստեղծի հնարավորություն գործնականում խուսափել իրադարձութենակենտրոն պատմությունից:

Հեղինակի ստացած արդյունքների ուսուցողական նշանակությունն այն է, որ ատենախոսությունը կարող է կիրառվել որպես դասախոսական նյութ բուհերում փիլիսոփաների, պատմաբանների, հումանիտար ոլորտի մասնագետների պատրաստման համար:

Ատենախոսական աշխատանքը գերծ չէ որոշ թերություններից՝

Ատենախոսության չորրորդ գլխում նույնացված են քաղաքագիտական և սոցիալփիլիսոփայական մոտեցումները: Սակայն այդ տրամաբանական հասկացությունների ծավալները չեն համընկնում: Իմաստային տարբերություն կանան բովանդակության առումով:

Որպես եզրակացություններ ամփոփված ատենախոսական հետազոտության առաջին և երկրորդ նշված արդյունքները /էջ 244/՝ պատմության փիլիսոփայական հայեցակերպերի մեթոդաբանական վերլուծությունն ու այդ հայեցակերպերի բացահայտումն ու որոշարկումն ըստ էության նույն բանն են:

Հեղինակը խնդիր է դնում դասակարգել պատմության փիլիսոփայական հայեցակերպերից բխող խնդիրները /էջ 11/, այնինչ դասակարգման մեթոդական հնարքը բնորոշ է բնագիտությանը, հումանիտար հետազոտություններում կիրառելի է տիպաբանումը:

Նշված թերությունները չեն նսեմացնում աշխատանքի գիտական արժեքը, այլ առաջարկություններ են հեղինակի հետագա հետազոտական աշխատանքների համար: Կարելի է պնդել, որ այս դոկտորական ատենախոսությունը էական ներդրում է փիլիսոփայության բնագավառում, այն մեթոդաբանորոն հիմնավորված է և ունի մեծ նշանակություն հայրենի պատմագիտության համար: Ընդհանուր առմամբ այն կարող է գնահատվել որպես նոր գիտական հիմնախնդրի առաջադրում և լուծում:

Ատենախոսի կողմից հրատարակված աշխատություններն արտացոլում են
ատենախոսության հիմնական դրույթները: Սեղմագիրն արտացոլում է աշխատանքի
հիմնական բովանդակությունը և հեղինակի հիմնական ձեռքբերումները:

Եզրակացություն

Դ. Ռ. Մոսինյանի «Պատմության փիլիսոփայական հայեցակերպերի
մեթոդաբանական վերլուծություն» Թ. 00.01 «Փիլիսոփայություն» մասնագիտությամբ
փիլիսոփայական գիտությունների դոկտորի գիտական աստիճանի հայցման
ատենախոսությունը ավարտուն գիտահետազոտական աշխատանք է, որը
վերաբերում է տեսամեթոդաբանական և գործնական առումով արդիական թեմայի:
Դոկտորական ատենախոսությունը բավարարում է Հայաստանի
հանրապետությունում գիտական աստիճանաշնորհման սահմանված պահանջներին,
այն ամբողջական և արդիական գիտական աշխատանք է:

Ելնելով վերոշարադրյալից՝ գտնում եմ, որ ատենախոսության հեղինակ Դավիթ
Ռոմիկի Մոսինյանը արժանի է Թ. 00.01 «Փիլիսոփայություն» մասնագիտությամբ
փիլիսոփայական գիտությունների դոկտորի գիտական աստիճանի շնորհմանը:

Փիլիսոփայական գիտությունների դոկտոր, պրոֆեսոր

 Ա. Ե. Մկրտչյան

«Ա. Ե. Մկրտչյանի ստորագրությունը հաստատում եմ»:

Երևանի պետական համալսարանի
գիտական քարտուղար



Մ. Վ. Հովհաննիսյան

20.10.2024